

agreable ma maniere de proceder, & d'excuser si pour mieux faire comprendre l'humeur de nos Sauvages, i'ay esté contraint d'inferer icy plusieurs choses quisembleront inciviles & extrauagantes, d'autant que l'on || ne peut pas donner une entiere cognoissance 205 d'un pays estranger, ny ce qui est de son gouuernement, qu'en faisant voir avec le bien, le mal & l'imperfection qui s'y retrouue: autrement il ne m'eust fallu descrire les mœurs des Sauvages, s'il ne s'y trouuoit rien de Sauvage, mais des mœurs polies & civiles, comme les peuples qui sont cultiuez par la Religion & pieté, ou par des Magistrats & Sages, qui par leurs bonnes loix eussent donné quelque forme aux mœurs si difformes de ces peuples barbares, dans lesquels on void bien peu reluire la lumiere de la raison, & la pureté d'une nature espurée.

Deux iours auant nostre arriuée aux Hurons, nous trouuafmes la mer douce, sur laquelle ayans trauerfé d'Isle en Isle, & pris terre au pays tant desiré par un iour de dimanche feste sainct Bernard, enuiron midy, que le soleil donnoit à plomb: Je me prosterné deuant Dieu, & baisé la terre en laquelle ce Souuerain Monarque m'auoit amené pour annoncer sa parole & ses merueilles à un peuple qui ne le cognoissoit point, & le prié de m'assister de ses graces, & d'estre par tout mon guyde pour faire toutes choses selon ses diuines volontez, & au salut de ce peuple; puis mes Sauvages ayans ferré leur canot dans un bois qui estoit là auprès, me chargerent de mes hardes & paquets qu'ils auoient tousiours auparauant portez par les Sauts, car la longue distance qu'il y auoit de là au